

G Chinese 2


Vol II

v. 2

精校  
古今醫案按

上海會文堂書局印行







古今醫案按卷第二

吳江李齡壽辛垞重輯

嘉善俞震東扶纂輯

男念祖永修較字

得璜礪溪

孫男掌明同若全較

賂南貽賢

溫熱病

朱氏全生集曰。自霜降後。至春分前。天令嚴寒。水冰地凍。其殺厲之氣。人觸犯之。即時病者。為正傷寒。若雖冬月。而天令溫暖。感之。則為冬溫。如至春分節後。天令溫暖。感之而病者。為溫病。若雖至春分。而天令尚寒。人有感寒而病者。亦傷寒也。若夏至後。天道壯熱。人感邪而病。其脈洪大。為熱病。若四五六七八月之間。天道忽有暴寒。人感之而為病者。乃時行寒疫也。若四時天令不正。感而為病。長幼相似。復能傳染者。此



名時氣。即時疫也。非傷寒比也。又云冬時感受寒邪而不即病。伏於身中。至春變為溫病。至夏變為熱病。夫溫熱二病。乃冬月伏寒之所變。既變之後。不得復言寒矣。此外又有風溫濕溫。一皆發熱。狀類傷寒。故醫家通以傷寒稱之。其通稱傷寒者。因發熱傳變。皆相類也。至於用藥。則不同矣。此數種。乃仲景所未論。又在痙濕暍三項之外。必須辨之。

王肯堂治一孕婦。春夏之交。患溫病。頭痛發熱。不惡寒而渴。未及療治。胎墮。去血無算。昏眩欲絕。王令以麥門冬。勛許入。淡竹葉。香豉煎。頻飲之。汗出而愈。蓋用勞復法治之也。

張路玉治徐君育。素稟陰虛多火。且有脾約便血證。十月間。患冬溫發熱。咽痛。里醫用麻黃杏仁半夏枳橘之屬。遂喘逆倚息。不得卧。聲嘶如啞。頭面赤熱。手足逆冷。右手寸關虛大微數。此熱傷手太陰氣分也。與姜蕤甘草等藥不應。為製豬膚湯一甌。令隔湯燉熱。不時挑服。三日聲清。終劑而痛如失。又治鄭墨林室。素有便紅。懷妊七月。正肺氣養胎時。而患冬溫。咳



嗽咽痛如刺。下血如崩。脉較平時。反覺小弱。而數。此熱傷手太陰血分也。與黃連阿膠湯。二劑。血止後。去黃連。加萎蕤桔梗。人中黃。四劑而安。

又治黃以寬風温十餘日。壯熱神昏。語言難出。自利溏黑。舌胎黑燥。唇焦鼻煤。先前悞用發散消導藥數劑。煩渴彌甚。張石頑曰。此本伏氣鬱發。更遇於風。遂成風温。風温脉氣本浮。以熱邪久伏。少陰從火化。發出太陽。即是兩感。變患最速。今幸年壯質強。已逾三日六日之期。證雖危殆。良由風藥性升鼓。激周身元氣。皆化為火。傷耗真陰。少陰之脉不能內藏。所以反浮。考諸南陽先師。元無治法。而少陰例中。則有救熱存陰。承氣下之一證。可借此以迅掃久伏之邪。審其鼻息不鼾。知腎水之上源未絕。無慮其直視失溲也。時歛醫胡晨敷。在坐。同議涼膈散。加人中黃。生地黄。服後下溏糞三次。舌胎未潤。煩渴不減。此盃水不能救車薪之火也。更與大劑涼膈。大黃加至二兩。兼黃連犀角。三下方能熱除。於是專用生津止渴。多服而愈。



又治陸中行室年二十餘臘月中旬患咳嗽捱過半月病熱少減新正五日復咳倍前自汗體倦咽喉乾痛至元夕忽微惡寒發熱明日轉為腹痛自利手足逆冷咽痛異常又三日則咳唾膿血張診其脉輕取微數尋之則仍不數寸口似動而軟尺部畧重則無審其脉證寒熱難分頗似仲景厥陰例中麻黃升麻湯證蓋始本冬溫所傷原不為重故咳至半月漸減乃勉力支持歲事過於勞役傷其脾肺之氣故咳復甚於前至望夜忽憎寒發熱來日遂自利厥逆者當是病中體疏復感寒邪之故熱邪既傷於內寒邪復加於外寒閉熱邪不得外散勢必內奔而為自利致邪傳少陰厥陰而為咽喉不利唾膿血也雖傷寒大下後與傷熱後自利不同而寒熱錯雜則一遂與麻黃升麻湯一劑肢體微汗手足溫暖自利即止明日診之脉亦向和嗣後與異功生脉合服數劑而安許學士云故人王彥龍作毘陵倉官季夏時病胸項多汗兩足逆冷謔語醫者不曉雜進藥已經旬日予診之其脉關前濡關後數予曰當作濕溫治之蓋先受暑後受濕



也。難經曰：濕溫之脈陽濡而弱，陰小而急，濡弱見於陽部，濕氣搏暑也。小急見於陰部，暑氣蒸濕也。暑濕相搏，是名濕溫。先以白虎加人參湯，次白虎加蒼朮湯，頭痛漸退，足漸溫，汗漸止，三日愈。此證屬賊邪，誤用藥，有死之理。有人難曰：何名賊邪？予曰：難經云：五邪有實邪、虛邪、正邪、微邪、賊邪。從後來者為虛邪，從前來者為實邪，從所不勝來者為賊邪，從所勝來者為微邪，自病者為正邪。又曰：假令心病，中暑得之為正邪，中濕得之為賊邪。今心先受暑而濕邪乘之，水剋火，從所不勝，斯謂之賊邪。五邪中之最逆也。

張路玉治范振麟，大暑中，患厥冷自利，六脈弦細，扎遲，按之欲絕，舌色淡白，中心黑潤無胎，口鼻氣息微冷，陽縮入腹，而精滑如冰，問其所起之由，因卧地晝寢受寒，是夜連走精二度，忽覺顛脹如山，坐起暈倒，便四肢厥逆，腹痛自利，胸中兀兀欲吐，口中喃喃妄言，與濕溫之證不殊。醫者誤為停食感冒，與發散消導藥，服後胸前頭項汗出如澆，背上愈加畏寒，而下



體如冰。一日昏憤數次。此陰寒挾暑入中。手足少陰之候。緣腎中真陽虛極。所以不能發熱。遂擬四逆。加人參湯。用人參一兩。熟附三錢。炮薑二錢。炙甘草二錢。晝夜兼進。三日中進六劑。決定第四日寅刻回陽。是日悉屏薑附。改用保元。人參五錢。黃芪三錢。炙甘草二錢。加麥門冬二錢。五味子一錢。清肅膈上之虛陽。四劑食進。改用生料六味。加麥冬五味。每服用熟地八錢。以救下焦將竭之水。使陰平陽秘。精神乃治。

喻嘉言治黃起潛春月病溫。頭面甚紅。謂曰。望八老翁。下元虛憊。陽浮於上。與在表之邪相合。所謂戴陽之證也。陽已戴於頭面。不知者更行表散。則孤陽飛越。危殆立至矣。此證只有陶節菴立法甚妙。以人參附子等藥收拾陽氣。歸於下元。而加葱白透表以散外邪。如法用之。即愈。萬不宜遲。渠駭為偏僻之說。更醫投以表藥。頃刻陽氣升騰。肌膚粟起。又頃刻寒顫咬牙。渾身凍裂而逝。

喻嘉言治金鑑春溫。已二旬外。壯熱不退。讖語無倫。皮膚枯燥。胸膈板結。



舌卷唇焦。身踈足冷。二便畧通。似渴非渴。面上一團黑滯。從前汗下和溫之法。歷試不效。喻曰。此證與兩感傷寒無異。內經原謂六日死。因春溫證不傳經。故雖邪氣留連不退。猶可多延幾日。待元氣竭絕。乃死。觀其陰證。陽證兩下。混在一區。治陽則碍陰。治陰則碍陽。與兩感病情符合。仲景原無治法。惟論序有發表攻裏本自不同之說。即師其意。以麻黃附子細辛兩解在表。陰陽之邪果然。皮間透汗而熱全清。再以附子瀉心湯兩解在裏。陰陽之邪果然。胸前柔活。人事明了。諸證俱退。次日即索粥。以後竟不需藥。只此二劑而起。一生於九死。快哉。

震按此條立法甚巧。惜不載脈象若何。然讀嘉言春溫論自述收功反掌。并詆人見熱煩枯燥之證。而不敢用附子者之愚。則脈不必論耶。又云。冬不藏精之春溫。初發時未必脈微數。惟不用麻附細辛麻附甘草二方。馴至脈微且數。而汗下溫皆不能救。見解獨闢。又周禹載曰。溫疫大法。以證為則。毋專以脈為據。亦必有所見而云然也。



一人夏月遠行勞倦歸感熱證下痢膿血身如燔炙舌黑而燥夜多讖語林北海視之曰此陽明病也不當作痢治但脉已散亂忽有忽無狀類蝦游殆不可治其家固請用藥林曰陽明熱甚當速解其毒在古人亦必急下之以存真陰之氣然是證之源由於勞倦陽邪內灼脉已無陰若驟下之則毒留而陰絕死不治矣勉與養陰以冀萬一用熟地一兩生地麥冬歸芍甘草枸杞佐之戒其家曰汗至乃活服後熱不減而讖語益狂悖但血痢不下身有微汗畧出即止林診之則脉已接續分明洪數鼓指喜曰今生矣仍用前方去生地加萸肉丹皮山藥棗仁連服六貼讖妄昏熱不減其家欲求更方林執不可又二日診其脉始斂而圓乃用四順清涼飲子加熟地一兩大黃五錢下黑矢而諸證頓愈越二日忽復狂讖發熱喘急口渴舉家惶惑謂今必死矣林笑曰豈忘吾言乎得汗即活矣此緣下後陰氣已至而無以鼓動之則營衛不洽汗無從生不汗則虛邪不得外達故內沸而復也病從陽入必從陽解遂投白朮一兩乾薑三錢甘草一



錢歸芍各三錢。盡劑。汗如注。酣卧至曉。病良已。

震按此證疑難在於初末。初時脉類蝦游。若援張景岳證實脉虛之說。而用參朮薑附則必死。末後狂熱復發。若引吳又可餘邪注胃之說。而用白虎承氣亦必危。此案見解用藥俱佳。然其得生處在於養陰而血。痢頓止。脉即應指耳。中間連服六貼。識妄昏熱不減。幸不見手足厥冷。尤幸不至聲啞不語。絕穀不食也。則以脉之斂而圓故也。但白朮一兩。乾薑三錢。以治狂熱喘渴。殊難輕試。

徽人江仲璉。胃寒發熱。兩項壅腫如升大。臂膊磊塊無數。不食不便。狂躁發渴。診其脉浮數無序。醫作傷寒發毒治。高鼓峯曰。誤矣。此燥逐風生也。用大劑疎肝益腎湯。熟地加至二兩許。五劑而腫退。便解。十劑而熱除。食進。再用補中益氣湯加麥冬五味。調理而愈。

震按今之所謂傷寒者。大概皆溫熱病耳。仲景云。太陽病發熱而渴。不惡寒者。為溫病。在太陽已現熱象。則麻桂二湯必不可用。與傷寒迥別。



內經云熱病者皆傷寒之類也。是指諸凡驟熱之病皆當從傷寒例觀。二說似乎不同。因審其義。蓋不同者在太陽。其餘則無不同也。溫熱病只究三焦。不講六經。此是妄言。仲景之六經百病不出其範圍。豈以傷寒之類。反與傷寒截然兩途乎。葉案云。溫邪吸自口鼻。此亦未確。仲景明云。伏氣之發。李明之。王安道俱言冬傷於寒。伏邪自內而發。奈何以吳又可溫疫論牽混耶。惟傷寒則足經為主。溫熱則手經病多。如風溫之咳嗽息鼾。熱病之神昏譫語。或溇瀉粘垢。皆手太陰肺手厥陰心胞絡手陽明大腸現證。甚者喉腫肢掣。昏蒙如醉。躁擾不寧。齒焦舌燥。發痧發頤等證。其邪分佈充斥。無復六經可考。故不以六經法治耳。就予生平所驗。初時兼挾表邪者最多。仍宜發散。如防葛。豉薄。牛蒡。杏仁。滑石。連翹等。以得汗為病輕。無汗為病重。如有斑。則參入蟬退。桔梗。蘆根。西河柳之類。如有痰。則參入土貝。天蟲。瓜蒌。橘紅之類。如現陽明證。則白虎承氣。少陽證。則小柴胡。去參半。加花粉。知母。少陰證。則黃連。阿膠。



湯豬苓湯豬膚湯俱宗仲景六經成法有效。但溫熱病之三陰證多死。不比傷寒。蓋冬不藏精者。東垣所謂腎水內竭。孰為滋養也。惟大劑養陰。佐以清熱。或可救之。養陰如二地。二冬。阿膠。丹皮。元參。人乳。蔗漿。梨汁。清熱如三黃。石膏。犀角。大青。知母。蘆根。茅根。金汁。雪水。西瓜。銀花。露絲瓜汁。隨其對證者選用。若三陰經之溫藥。與溫熱病非宜。亦間有用真武理中者。百中之一二而已。大抵溫熱病。最怕發熱不退。及瘧厥昏蒙。更有無端而發。暈及神清而忽間以狂言者。往往變生不測。遇此等證。最能惑人。不比陽證。陰脈。陽縮。舌卷。撮空。見鬼者。易燭其危也。要訣在辨明虛實。辨得真方可下手。然必非劉河間吳又可之法所能救。平素精研仲景傷寒論者。庶有妙旨。至如葉案之論溫熱。有邪傳心胞。震動君主。神明欲迷。瀰漫之邪。攻之不解。清竅既蒙。絡內亦痺。豁痰降火。無效者。用局方至寶丹。或紫雪。或牛黃丸。宗喻氏芳香逐穢宣竅之說。真足超越前賢。且不蹈用重藥者一匙偶悞。覆水難收之弊也。此翁聰

明誠不可及。今所選之案雖少。而諸法畢備。亦足為學者導夫先路矣。  
瘟疫

李東垣曰。脾胃受勞役之疾。飲食又復失節。耽病日久。及事息心安。飽食太甚。病乃大作。向者壬辰改元。京師戒嚴。迨三月下旬。受敵者凡半月。解圍之後。都人之不受病者。萬無一二。既病而死者。繼踵而不絕。都門十有二所。每日各門所送。多者二千。少者不下一千。似此者。幾三月。此百萬人。豈俱感風寒外傷者耶。大抵人在圍城中。飲食失節。勞役所傷。不待言而知。由其朝飢暮飽。起居不時。寒溫失所。動經兩三月。胃氣虧乏久矣。一旦飽食太過。感而傷人。而又調治失宜。或發表。或攻下。致變結胸發黃。又以臨胸茵陳等湯下之。無不死者。蓋初非傷寒。以誤治而變。似真傷寒之證。皆藥之罪也。因以生平已試之效。著內外傷辨論一篇。

震按此即大兵之後。繼以大疫之謂也。觀此論而始曉然於勞役飢飽之病原。誠哉其為內傷矣。如是之疫。宜補不宜瀉。若達原飲白虎承氣。



明誠不可及。今所選之案雖少，而諸法畢備，亦足為學者導夫先路矣。

瘟疫

李東垣曰：脾胃受勞役之疾，飲食又復失節，耽病日久，及事息心安，飽食太甚，病乃大作。向者壬辰改元，京師戒嚴，迨三月下旬，受敵者凡半月，解圍之後，都人之不受病者，萬無一二。既病而死者，繼踵而不絕。都門十有二所，每日各門所送，多者二千，少者不下一千。似此者，幾三月。此百萬人，豈俱感風寒外傷者耶？大抵人在圍城中，飲食失節，勞役所傷，不待言而



正犯東垣所呵責也。考其時是金天興元年。因蒙古兵退而改元耳。尋以疫後。醫師僧道園戶鬻棺者擅厚利。命有司倍征之。以助國用。民生其時。豈不苦極。若今太平之世。民皆安樂飽暖。縱有勞役及飲食失節者。不過經營辛苦之輩。設不兼外感。亦不遽病。故大疫絕無。而恰合東垣內傷論者亦甚少。惟是飽暖思淫慾。真陰卻早內傷。則外感病中之虛症。反不少耳。

衛生寶鑑曰。總帥相公年近七旬。南征過揚州。俘虜萬餘口。內選美色室女。近笄者四。置於左右。予曰。新虜之人。其驚憂之氣。畜於內。加以飲食失節。多致疾病。近之。則邪氣傳染。為害最大。况年高氣弱。尤宜慎也。總帥不聽。至臘月。班師大雪。新虜人凍餒皆病。頭疼咳嗽。自利腹痛。多致死亡。正月至汴。相公因赴賀宴。痛飲數次。遂病。脉沈細而弦。三四動一止。現證與新虜人病無異。三日而卒。內經云。乘年之虛。遇月之空。失時之和。因而感邪。其氣至骨。可不畏哉。



震按喻嘉言疫病論引仲景平脉篇中寸口脉陰陽俱緊者一節闡發  
奧理謂清邪中上從鼻而入於陽濁邪中下從口而入於陰在陽則發  
熱頭痛項強頸攣在陰則足膝逆冷便溺妄出大凡傷寒之邪由外廓  
而入故遞傳六經瘟疫之邪由口鼻而入故直達三焦三焦相溷內外  
不通致有口爛舌斷聲喑咽塞癆膿下血臍築湫痛等變治法未病前  
預飲芳香正氣藥使邪不能入若邪既入則以逐穢為第一義此與吳  
又可之論暗合較之李羅二家所述勞役憂驚凍餒致病者迥別惟云  
因病致死病氣尸氣混合不正之氣種種惡穢交結互蒸人在其中無  
隙可避斯無人不病是誠諸疫所同然向來辟疫方法或以雄黃塞鼻  
或吃蒜頭燒酒或於髮中簪霹靂木或家供文昌大洞經然有驗有  
不驗蓋大疫之興闕乎劫運應遭劫者莫可逃也相傳崇正十六年自  
八月至十月京城大疫猝然而死醫禱不及後有外省人員到京能識  
此病看膝灣後有筋腫起紫色無救紅色速刺出血可無患人爭就看



死者已二十餘萬。此前明亡國之徵。豈非劫運乎。

汪石山治一少年。房勞後。忽洒洒惡寒。自汗發熱。頭背胃脘皆痛。唇赤舌強。嘔吐。眼胞青色。醫投補中益氣。午後譫語惡熱。小便長。初日脉皆細弱。而數次。日脉浮弦。而數。醫以手按臍下痛。議欲下之。汪曰。此疫也。疫兼兩感。內傷重。外感輕。耳臍下痛者。腎水虧也。若用利藥。是殺之也。茲宜合補降二法以治。用清暑益氣湯。去蒼朮澤瀉五味。加生地黃芩石膏。服十餘貼而安。

震按房勞後患疫。喻氏所謂太陽少陰兩感也。汪公則以內傷外感為兩感。義殊不同。補中益氣清暑益氣藥頗相同。而一則變劇。一則取效者。妙在加減諸味也。

壺仙翁治張文學病時疫。他醫診其脉兩手俱伏。曰陽證見陰不治。欲用陽毒升麻湯升提之。壺曰。此風熱之極。火盛則伏。非陰脉也。升之則死矣。卒用連翹涼膈之劑。一服而解。



震按此條是溫疫病以證為則勿專以脈為憑之一據

虞恆德治一婦三月間患瘟疫證三日經水適來發熱愈甚至七八日病劇胸中氣築作痛不能卧眾醫技窮入夜迎虞病者令婢磨胸不已六脈俱微數極無倫次又若蝦遊狀虞問曰恐下早成結胸耳主人曰未也虞曰三日而經水行則裏虛與下同乃用四物湯黃龍湯小陷胸湯共為一劑加薑棗主人曰此藥何名虞曰三合湯也一服而諸證悉減

震按此以大黃黃連生地人參同用亦近日治熱病之常法

吳又可曰朱海疇者年四十五歲患疫得下症四肢不舉身卧如塑目閉口張舌上胎刺問其所苦不能答因問其子兩三日所服何藥云進承氣湯三劑每劑投大黃兩許不效更無他策求決死期余診得脈尚有神下證悉具藥淺病深也先投大黃一兩五錢目有時而稍動再投舌刺無芒口漸開能言三劑舌胎稍去神思稍爽四日服柴胡清燥湯五日復生芒刺煩熱又加再下之七日又投承氣養榮湯熱稍退八日仍用大承氣肢



體自能稍動計半月共服大黃十二兩而愈。又數日始進糜粥調理兩月半平復。凡治千人所遇此等不過三四人而已。

震按此條結句云千人中不過三四人自言其不可以為法也。案中不載神昏譫語可見昏譫之至者多不能救。此人原非絕證也。惜不載脉象虛實若何。然云脉尚有神。想即陶氏所謂有力為有神也。輟耕錄載元伯顏平宋後搜取大黃數十車滿載而去。班師過淮俘掠之民及降卒與北來大兵咸病疫以大黃療之全活甚眾。宋元通鑑載作耶律楚材滅夏之事則大黃洵治疫之妙品也。吳又可溫疫論贊大黃為起死神丹原非杜撰。然與東垣所論則迥別矣。要之兩家各有至理惟明乎運氣熟於脉證者兩家之說俱可救人也。

孫東宿有僕孫安遠行途次食麪三碗勞倦感疫又加麪傷表裏皆熱昏悶譫語頭痛身痛腹痛醫以遇仙丹下之大便瀉三四十行邪因陷下而為挾熱下利之候舌沉香色額疼口乾燥渴煩悶昏昏憤憤脉左弦數右



洪數但不充指。知為誤下。壞證。以柴胡石膏各三錢。白芍黃芩竹茹葛根各一錢。花粉甘草各五分。山梔枳實各七分。葱白五莖。煎服後半夜吐蛔一條。稍得睡。次早大便猶瀉二次。嘔吐酸水。腹仍痛。改用小柴胡加滑石竹茹。夜熱甚。與絲瓜汁一碗。飲既神頓清爽。少頃藥力過時。煩熱如前。再以絲瓜汁一大碗進之。即大發戰。東宿謂此非寒戰。乃作汗之徵耳。不移時。汗果出而熱依然。因憶活人書云。再三汗下熱不退。以人參白虎湯加蒼朮一錢。如神。迹此。再加元參升麻柴胡白芍黃連。飲後身上發斑。先發者紫。後發者紅。中夜後乃得睡而熱散。斑尋退去。腹中微疼。腸鳴口渴。右脉尚滑。左脉已和。再與竹葉石膏湯加白芍蒼朮。服後睡安。腹仍微痛。用柴胡白芍各一錢。人參酒芩陳皮半夏各六分。甘草三分。烏梅一個。腹痛漸減而愈。惟兩胯痛不能轉動。此大病後汗多而筋失養之故。用參芪白芍。杞。苡。仁。木。瓜。熟。地。歸。身。川。柏。牛。膝。桑。寄生。調養全安。

震按戰汗後熱不退勢亦危矣。引用活人書治法極佳。再看其石膏人



參之去取並不執着兩胯疼痛之調養方更周到的是高手。

程家內眷其夫歿於疫癘新寡七日疫即及之大熱頭疼口渴胸脇逆痛醫與小柴胡湯夜忽夢夫交洩而覺冷汗淫淫四肢如解略不能動神昏譊語面如土色舌黑乾硬迺孫東宿診之六脉沉弦而數大小便俱秘乃曰此亦陰陽易類也疫後有是危已極矣以生脉散加柴苓桂枝甘草水煎將伊夫昔穿舊袴襠燒灰調下兩劑而神醒體溫汗飲舌焦漸退次日仍以前方加棗仁竹茹四肢始能運動徐進粥湯而愈。

震按夢中之陰陽易大奇故夫之燒視散更巧。

張路玉曰瘟有蝦蟇瘟鷓鴣瘟疔瘡瘟瓜瓢瘟形證各別龐安常又有玳瑁瘟之說余治洪德數女初冬發熱頭痛胸滿不食已服過發散消導藥四劑至第六日周身痛楚腹中疼痛不時奔響屢欲圍而不可得口鼻上唇忽起黑色成片光亮如漆與玳瑁無異見者大駭余診之喘汗脉促神氣昏憤雖脉證俱危喜其四圍有紅暈鮮澤若痘瘡之根脚緊附如線他



處肉色不變。許以可治。先與葛根、黃芩、黃連湯，加犀角、連翹、荆防、紫荊皮、人中黃，解其肌表毒邪。俟其黑色發透，乃以涼膈散加入中黃、紫荊、犀角微下二次。又與犀角地黃湯加入中黃之類，調理半月而安。

震按：戈存橘補天石有黃耳赤膈二證，赤膈亦頭疼身痛發熱，但胸膈赤腫或起泡，用荆防敗毒散去參，加犀角、芩連、紫荊皮，表證退後，便燥者用涼膈散。張公之案，蓋本於此，但所敘諸瘟，近不概見。蓋世值

聖明光天化日之下，疫鬼潛踪矣。故屠蘇飲久不用，而老君神明散、務成子螢火丸、太倉公辟瘟丹、李子建殺鬼圓等，皆無人道及。惟五瘟丹、消毒丸、黑奴丸、人中黃丸、香蘇散、清涼救苦散等方，尚有用者。以其藥平穩而方簡易也。

外紀載哥阿島患疫，有名醫卜加得，令城內外遍舉大火燒，一晝夜，火息而病愈。蓋疫為邪氣所侵，火氣猛烈，能焚燼諸邪，邪盡則病愈。有至理焉。又云：時氣一行，以草繩度病人之戶，屈而結之於壁，則一家不染。



又過庭錄云。趙清獻公好焚香。謂可却疾并辟疫。此與舉火義頗合。

### 大頭瘟

泰和二年四月。民多疫病。初覺憎寒壯熱。體重次傳頭面腫甚。目不能開。上喘咽喉不利。舌乾口燥。俗云大頭傷寒。染之多不救。張縣丞患此。醫以承氣湯加藍根下之。稍緩。翌日其病如故。下之又緩。終莫能愈。漸至危篤。請東垣視之。乃曰。身半以上。天之氣也。邪熱客於心肺之間。上攻頭面而為腫。以承氣瀉胃。是誅伐無過。殊不知適其病所為故。遂用芩連各五錢。苦寒瀉心肺之火。元參二錢。連翹板藍根馬勃鼠粘子各一錢。苦辛平清火散腫消毒。殭蠶七分。清痰利膈。甘草二錢。以緩之。桔梗三分。以載之。則諸藥浮而不沉。升麻七分。升氣于右。柴胡五分。升氣于左。清陽升于高巔。則濁邪不得復居其位。經曰。邪之所湊。其氣必虛。用人參二錢。以補虛。再佐陳皮二錢。以利其壅滯之氣。名普濟消毒飲子。若大便秘者。加大黃。共為細末。半用湯調。時服之。半用蜜丸。噙化。且施其方。全活甚眾。

古今

醫案按

卷二

十一



羅謙甫治中書右丞姚公茂六旬有七宿有時毒至元戊辰春因酒再發  
頭面皆腫而痛耳前後腫尤甚胸中煩悶咽嗑不利身半以下皆寒足脛  
尤甚由是以床接火炕身半以上卧於床身半以下卧於炕飲食減少精  
神困倦而體弱命羅治之診得脉浮數按之弦細上熱下寒明矣內經云  
熱勝則腫又云春氣者病在頭難經云畜則腫熱砭射之也遂於腫上約  
五十餘刺其血紫墨如露珠之狀頃時腫痛消散又於氣海中大艾炷灸  
百壯以助下焦陽虛退其陰寒次於三里二穴灸三七壯治足胻冷亦引  
導熱氣下行故也復處一方名曰既濟解毒湯芩連苦寒酒製炒為因用  
瀉其上熱以為君桔梗甘草辛甘溫上升佐諸苦藥以治熱柴胡升麻苦  
平味之薄者陰中之陽發散上熱以為臣連翹苦辛平以散結消腫當歸  
辛溫和血止痛酒煨大黃苦寒引苦性上行至巔驅熱而下以為使投劑  
之後腫消痛減大便利再服減大黃不旬日良愈

附故友丁漢奇兄素嗜酒十二月初醉中夜行二里許次日咳嗽身微



熱兩目腫。自用羌芷芎芩等藥。頤皆腫。又進一劑。腫至喉肩胸膈。咳聲頻而不爽。氣息微急。喉有痰聲。其腫如匏。按之熱痛。目赤如血。而便瀉足冷。六脉細數。右手尤細軟。略一重按即無。有用普濟消毒飲子者。予疑其脉之虛。恐非芎連升麻所宜。勸邀沈堯封先生診之。曰。此虛陽上攻。斷勿作大頭天行。治病者曰。內子歸寧絕慾兩月矣。何虛之有。沈曰。唇上黑痕一條。如乾焦狀。舌白如傅粉。舌尖亦白不赤。乃虛寒之確據。况泄瀉足冷。右脉濡微。斷非風火之象。若有風火。必現痞悶煩熱燥渴不安。豈有外腫如此。而內裏安貼如平人者乎。遂用芩絲枸杞牛膝茯苓。益智龍骨。一劑而腫定。二劑而腫漸退。右脉稍起。唇上黑痕亦退。但舌仍白厚。伸舌即顫掉。手亦微振。乃用六君加沉香。而腫大退。目赤亦減。嗽緩痰稀。舌上白胎去大半矣。又次日再診。右脉應指不微細。重按仍覺空豁。肝氣時動。兩顴常赤。口反微渴。復用參苓杞芍橘紅龍骨沙蒺補元益腎飲汗而全愈。

震按此條與景岳治王蓬雀喉痺案彷彿。用



藥更覺穩而巧。人所難及。若犯桂附或雜地黃。即不能恰合病情矣。

孫東宿治張孝廉患疫。頭大如斗。不見項。唇垂及乳。色如豬肝。昏憤不知人事。見者駭而走。孫診其脉。皆浮弦而數。初以柴胡一兩。黃芩元參各三錢。薄荷連翹葛根各二錢。甘草一錢。服三劑。寒熱退。弦脉減。但洪大。知其傳於陽明也。改以貫眾一兩。葛根花粉各三錢。甘草一錢。黑豆四十粒。三劑而愈。

震按疫癘之行。必由運氣內經原有剛柔失守。三年化疫之說。蓋陽干為剛。陰干為柔。凡陽干司天。則陰干在泉。陰干司天。則陽干在泉。各以其合。如甲與己合為剛柔得位也。失守者。如甲子歲少陰司天。若上年癸亥。天數有餘者。年雖交得甲子。厥陰猶未退位。而地之陽明己卯。已經遷正。是以癸亥年之司天。臨甲子年之在泉。上癸下己。為剛柔失守。後三年化成土疫。或少陰己交司天。而地未遷正。上年之戊寅。少陽猶在泉。是甲與戊對。亦不相合。後三年化成土癘。依此例以推之。丙辛失



守者化水疫。庚乙失守者化金疫。丁壬失守者化木疫。戊癸失守者化火疫。其四屬亦照前例。經文可考也。竊意此義太淺。未必能驗。王肯堂曰。運氣之說。內經幾居其半。蓋泥其常。不通其變。則以為無驗。夫運氣所主者。常也。異氣所主者。變也。常則如本氣。變則無所不至。而各有所占。故其候有從逆。淫鬱。勝復。太過。不及之變。其發皆不同。若厥陰用事。多風。而草木榮茂。是之謂從。天氣明潔燥而無風。此之謂逆。太虛埃昏。流水不冰。此之謂淫。大風折木。雲物濁擾。此之謂鬱。山澤焦枯。草木凋落。此之謂勝。大暑燔燎。螟蝗為災。此之謂復。山崩地震。埃昏時作。此之謂太過。陰森無時。重雲晝昏。此之謂不及。隨其所變。疫癘應之。皆視當時常處之候。雖數里之間。但氣候不同。而所應全異。豈可膠於一定。熙寧中。京師久旱。祈禱備至。連日重陰。人謂必雨。一日驟晴。炎日赫然。沈括因事入對。上問雨期。沈對曰。雨候已見。期在明日。眾以為頻日晦。尚且。不雨。如此陽燥。豈復有望。次日果大雨。是時濕土用事。連日陰者。



從氣已效。但為厥陰所勝，未能成雨。後日驟晴者，燥金入候，厥陰當折。則太陰得伸，明日運氣皆順。以是知其必雨。嗚呼！安得如存中者而與之言運氣哉？震思此等推測，實有至理。聰明者精心探索，能得疫癘之所由來，即得所以治之之道。聖散子為東坡存中應驗之方，故刊布以救人。想亦適合是年之運氣耳。普濟消毒飲并刻諸石龔雲林於明萬曆寓大梁，值大頭瘟大作，用秘方二聖救苦丸百發百中。今皆不盡應驗也。以是知病無板方，醫無呆法，總貴乎神而明之耳。

二聖救苦丸方載在萬病回春節或源註

暑

孫兆治一姜姓酒家病久將絕，腹滿不省人事，遍身皆潤，兩足冷至膝下。診之六脉皆小弱而急，問其所服藥皆陰病藥也。孫曰：此非受病重，藥能重病耳。遂用五苓散利小便而腹減，白虎湯解邪熱而病愈。蓋病本傷暑，始則陽微厥而脉小無力，眾醫遽以陰證治，其病愈厥不知陰證。脛冷兩臂亦冷，今脛冷臂不冷，則非下厥上行，所以知是陽微厥也。



震按孫公辨證誠妙。然脛冷臂亦冷。尚非陰證之確據。須視其冷之微甚。再合兼見之證以參之。此條因不省人事。難問所苦。姑就陽微厥為辨耳。又有疑者。斯人多服陰病藥。何以不死。既曰暑濕。何以不用桂苓甘露飲。而先用五苓散。五苓有肉桂。與陰病藥亦不甚相遠。諒係暑證夾陰。前醫未為大謬。

滑伯仁治臨安沈君彰。自汗如雨不止。面赤身熱。口燥心煩。居樓中。當盛夏。惟幕周密。自云至虛亡陽。服朮附藥已數劑。伯仁診其脉虛而洪數。視其舌上胎黃。曰前藥誤矣。輕病重治。醫者死之。素問曰必先歲氣。毋伐天和。朮附之熱。其可輕用以犯時令耶。又曰脉虛身熱。得之傷暑。家本多汗。加以剛劑。脉洪數。則病益甚。悉令撤幔開窗。初亦難之。少頃漸覺清爽。為製黃連人參白虎等湯。三進而汗止大半。諸證稍解。又兼以既濟湯。渴用水調天水散。服七日而病悉去。後徧身發瘍疹。更服防風通聖散。乃已。



朱丹溪治徐三官人年五十餘六月間發熱大汗惡寒戰慄不自禁持且煩渴朱曰此暑病脉之昏虛微細弱而數其人好賭致勞而虛遂以人參竹葉湯調四苓散八帖而安。

震合三案參之知暑脉必虛必數虛者暑傷氣也數者暑為熱也但有細與洪之不同孫案之小弱而急急亦數也數主熱又主虛故暑病宜涼宜補者多宜溫者誠少下條之脉細數而實指為熱藥傷血見解更上一層。

項彥章治一人病甚醫皆以為瘵束手矣項診之脉細數而實細數者暑也暑傷氣脉宜虛今不虛而反實乃熱傷血藥蒸之也以白虎飲之即瘥吳芟山治一婦冬月洒洒惡寒翕翕發熱惡食乾嘔大便欲去不去諸醫皆以虛弱痰飲治之用二神補心等藥不效延及半月吳診其脉虛而無力類乎傷暑眾不然之究問病因婦曰因天寒換着綿衣取綿套一床蓋之須臾煩渴寒熱嘔吐綿延至今耳吳曰誠哉傷暑也蓋綿套晒之盛暑



夾熱收入笥中。必有暑氣。尚未開泄。體虛者得之。易入。故病如是。婦曰。然遂製黃連香薷飲。連進二服而愈。

震按此說。殊未可信。綿套久收笥中。暑氣能有幾何。頓令寒熱嘔吐煩渴。綿延不愈耶。但脈虛無力。用黃連香薷飲而愈。則誠暑矣。留之作疑案以待試。

汪石山治一兒。年十餘歲。色白神怯。七月間發熱連日。父令就學。內外俱勞。循至熱熾。頭痛吐瀉。食少。其父知醫。乃進理中湯。吐瀉少止。漸次眼合。咽啞不言。昏昧不省人事。粥飲有碍。手常搯住陰囊。為灸百會。尾骶不應。其父來問。汪曰。兒本氣怯。又兼暑月過勞。經云。勞則氣耗。又云。勞倦傷脾。雖在暑月。乃內傷證耳。身熱者。經云。陽氣者。煩勞則張。蓋為氣本陽。和勞則陽和之。氣變為邪熱矣。頭痛者。經云。諸陽皆會於頭。今陽氣亢極。則邪熱熏蒸於頭。而作痛也。吐瀉者。脾胃之清氣不升。濁氣不降也。目閉者。蓋諸脈皆屬於目。而眼眶又脾所主。脾傷不能榮養。諸脈故眼閉而不開也。

古今

醫案按

卷二

五



咽啞者。蓋脾之絡連舌本。散舌下。脾傷則絡失養。故不能言也。經云脾胃者。水穀之海。五臟皆稟氣於脾。脾虛則五臟皆失所養。故肺之咽。嗑。為之不利。而食難嚥。心之神明。為之昏。瞶。而不知人。常欲手搵陰囊者。蓋無病之人。陰升陽降。一有所傷。則升者降。降者升。經云陰陽反作。是也。是以陰升者。反降。從其類而入。厥陰之囊。陰多陽少。故手欲搵之也。此皆脾胃之病。經謂土極似木。亢則害。承乃制也。證似風木。乃虛象耳。不治脾胃之虛。而治肝木之風。欲求活難矣。且用參芪三錢。附子一錢。灌半盃。病無進退。連服三日。神稍清。目稍開。如有生意。食仍難嚥。汪診之。脉皆浮緩。不及四至。汪曰。藥病相宜。可去附子。再服。漸漸稍甦。初醫或作風熱。而用荊防芩連之類。或作驚證。而用牛黃硃砂之類。此皆損胃之物。豈可輕投。兒今得生。幸耳。實賴其父之知醫也。

震按發熱連日。仍令就學。似乎不避風暑。再感外邪。以致熱熾。頭痛吐瀉。及進理中湯。吐瀉稍止。漸次眼合咽啞。昏昧不言。人必認為受邪既



重。悞用溫補邪陷難解。則用荆防芩連及至寶丹牛黃丸皆意中事也。用之而死仍歸咎於理中。寬枉誰辨。石山獨從平素之色白神怯病中之內外俱勞着想。作內傷虛證治。其議論皆有精義。至陽和之氣變為邪熱及陰陽反作等訓。學者書諸紳可也。

江應宿治其岳母年六十餘。六月中旬勞倦中暑。身熱如火。口渴飲冷。頭痛如破。脈虛豁。二三至一止。投人參白虎湯三貼。渴止熱退。惟頭痛。用白蘿蔔汁吹入鼻中。良愈。

又治孫子華赴試南都。六月初旬夢遺。畏寒驚懼。重裘厚被。取汗過多。身熱六脈滑數無力。與清暑益氣湯。次日舌強。語言不清。如癩。目瞪不識人。江曰。此為暑風。與人參白虎湯加膽星殭蠶秦艽天麻竹瀝薑汁。漸愈。數日後舌心黑如墨。與黃連解毒湯涼膈散。不退。與犀角地黃湯而愈。

又一人瘦長而脆。暑月過勞。飢飲燒酒。遂身熱汗出。昏懵語亂。江視之。脈皆浮小而緩。按之虛豁。曰。暑傷心。勞傷脾也。蓋心藏神。脾藏意。二臟俱傷。



宜有是證。法宜清暑益脾。用八物湯加麥冬山梔陳皮十餘貼而愈。

震按江公三案。平正可法。其第二案。解毒涼膈不應。換犀角地黃湯始愈。又知同一涼藥。亦有對證與不對證之別。

張路玉治金魯公。觸熱勞形。醉飽不謹。後受涼。遂發熱頭痛。脹滿喘逆。大汗如蒸。面赤戴陽。足冷陽縮。脉弦數無力。曰。此傷暑夾食。而復夾陰也。與大順散一服。不應。轉脹急不安。因與枳實理中。加厚朴大黃。是夜更衣二次。身涼足暖而痊。

震按此案於不謹後受涼。及戴陽陽縮足冷。汗多且喘。最易認作陰證。其辨在發熱頭痛脹滿。與陰證不合。要知不謹之前。尚有醉飽之病。因也大順散不應。轉加脹滿。病情易辨矣。更衣二次而痊。設誤服白通四逆奈何。

又按張潔古云。動而得之者為中暈。為陽證。靜而得之者為中暑。為陰證。以暑暈二字。析作兩項。殊屬不然。夫夏之暑暈。猶冬之寒冷也。指暈



為陽。指暑為陰。亦將派冷作陽。派寒作陰。耶。內經曰。先夏至日者為病溫。後夏至日者為病暑。明以時令別其病名耳。病暑之有陰有陽。一如傷寒之有陰有陽。大順散冷香飲子之類。實為納涼食冷。因避暑而受寒。固暑月之陰證也。非中暑也。所以羅謙甫治參政商公泄瀉。完顏小將軍斑痧二案。俱用熱藥。俱不名之曰中暑。吳球治暑月遠行之人。直曰中寒。恐後世悞以熱藥治暑。乃舉病因以稱之。誠為名正而言順。故以動靜分陰陽。則可以暑暍分陰陽。則不可。惟以脉證辨陰陽。斯可矣。近閱臨證指南。每用滑石蘆根通草白蔻杏仁等藥。以暑氣從鼻吸入。必先犯肺。故用輕清之藥。專治上焦。其西瓜翠衣鮮荷葉及荷葉邊汁鮮蓮子萊豆皮絲瓜葉銀花露竹葉心等。皆取輕清。以解暑邪之上蒙空竅。不犯中下二焦。殊有巧思。蓋暑病必究三焦。非比傷寒溫病矣。若來復丹大順散案中偶一見之。又足徵暑天陽證居多。陰證原少耳。

濕



中山王知府次子薛里年十三歲六月暴雨池水泛溢因而戲水衣服盡濕其母責之至晚覺精神昏憤急惰嗜臥次日病頭痛身熱腿腳沉重一醫用發散藥閉戶覆衾以致苦熱不禁遂發狂言欲去其衾而不得去是夜汗至四更濕透其衾明日尋衣撮空又以承氣湯下之後語言漸不出四肢不能收持有時項強手足痠痲搖急而攣目左視而白睛多口唇肌肉蠕動飲食減少形體頓瘦延羅謙甫視之具說前由蓋傷濕而失於過汗也夫人之元氣起於臍下腎間動氣周流一身通行百脉今盛暑之時大發其汗汗多則亡陽百脉行澀故三焦之氣不能上榮心肺心火旺而肺氣焦况因驚恐內畜內經曰恐則氣下陽主聲陽既亡而聲不出也陽氣者精則養神柔則養筋今發汗過多氣血俱衰筋無所養其病為瘥則項強手足痠痲搖急而攣目通於肝肝者筋之合也筋既燥而無潤故目左視而白睛多肌肉者脾也脾熱則肌肉蠕動故唇蠕動有時而作經云肉痿者得之濕地也脾熱者肌肉不仁發為肉痿痿者痿弱無力今氣欲



竭熱留於脾。故四肢不用。此傷濕過汗而成壞證。明矣。當治時之熱。益水之源。救其逆。補其上。升生發之氣。內經曰：熱淫所勝，治以甘寒，以酸收之。人參、黃芪之甘溫，補其不足之氣，而緩其急。搖故以為君。腎惡燥，急食辛以潤之。生甘草甘微寒，黃柏苦辛寒，以救腎水而生津液，故以為臣。當歸辛溫，和血脈。橘皮苦辛，白朮苦甘，炙甘草甘溫，以益脾胃，進飲食。肺欲收，急食酸以收之。白芍藥之酸微寒，以收耗散之氣，而補肺金，故以為佐。升麻、柴胡、苦平上升，生發不足之氣，故以為使。乃從陰引陽之謂也。早晚各投一服。三日後，語聲漸出，稍能行步，四肢柔和，食飲漸進，因誌其方曰：人參益氣湯。

震按：古人治濕病案，殊無高論奇方。故僅選此條，以為辨證處方之模範。今臨證指南，佳案甚多，良足私淑。其除氣分之濕，用滑石、白菟、杏仁、半夏、厚朴、瓜蒌皮為主。有熱則加竹葉、連翹、蘆根等。全取輕清之品。走氣道以除濕。若濕熱甚而舌白、目黃、口渴、溺赤，用桂枝、木猪苓、澤瀉、滑



石茯苓皮寒水石生白朮茵陳此從桂苓甘露飲加減濕熱作痞神識  
如蒙用人參苓連枳實生乾薑生白芍此從瀉心湯加減若脘中阻痛  
大便不爽用豆豉枳實川連薑汁苓半熟輕則去川連加鬱金橘紅苳  
仁杏仁此濕傷氣痺治法熱甚則用川連生朮厚朴橘白淡生薑渣酒  
煨大黃水法丸服此治氣阻不爽治腑宜通法濕傷脾陽腹膨用五苓  
散二朮膏濕熱橫清脉腰腹滿用小溫中丸以及脫痞便澹之用苓桂  
朮甘湯吞酸形寒之用苓薑朮桂湯雖皆古人成法而信手拈來無不  
脗合濕溫身熱神昏用犀角元參連翹心石菖蒲銀花野赤豆皮煎送  
至寶丹乃清熱通竅芳香逐穢法更奇者濕溫之頭脹耳聾呃忒鼻衄  
舌色帶白咽喉欲閉謂邪阻上竅空虛之所非苦寒直入胃中可治而  
用連翹牛蒡銀花馬勃射干金汁此俗人夢想不到者也不食不寐腹  
痛便窒脉遲小澀謂由平素嗜酒少穀濕結傷陽寒濕濁陰鳩聚為痛  
而用炒黑生附子炒黑川椒生淡乾薑葱白調入猪胆汁此加味白通



湯亦神奇。不可思議者也。更有嗜酒人胸滿不飢。三焦皆閉。二便不通。用半硫丸。又有病中啜厚味者。腸胃滯雖下。而留濕未解。肛門墜痛。胃不喜食。舌上白腐。用平胃散去甘草。加人參炮薑炒黑生附。此二條不。因酒肉。認作濕熱。竟以苦辛溫藥。通陽劫濕。尤覺高超。至如陽傷痿弱。有濕麻痺。雖痔血。而用薑附茯苓生朮。舌白身痛。足跗浮腫。太谿穴水。流如注。謂濕邪伏於足少陰。而用鹿茸淡附子。草果茯苓芩絲。以溫蒸。陽氣。均非淺識。所能步武。濕久脾陽消乏。腎真亦憊。中年未育子。用茯苓蒼朮菟子大茴鹿茸附子胡盧補骨赤石脂。倣安腎丸法。治病調元。化為合璧。益有觀止之嘆。濕門附此諸案。方法斯為全備。

### 消渴

羅謙甫曰。順德安撫張耘夫。年四十五歲。病消渴。舌上赤裂。飲水無度。小便數多。東垣先師以生津甘露飲子治之。旬日良愈。古人云。消渴多傳瘡。以成不救之疾。今效後不傳瘡。享年七十五歲而終。其論曰。消之為



病燥熱之氣勝也。內經云：熱淫所勝，治以甘苦，以甘瀉之。熱則傷氣，氣傷則無潤折熱，補氣非甘。寒之劑不能，故以人參、石膏、炙甘草、生甘草之甘寒為君。啟元子云：滋水之源，以鎮陽光，故以知柏、黃連、梔子之苦寒。瀉熱補水為臣，以當歸、麥冬、杏仁、全蝎、連翹、白芷、白葵、蘭香、甘辛、寒和、血潤、燥為佐，以升柴之苦平。行陽明、少陽二經。白豆蔻、萹荳、茄木、香薷、香反、佐以取之。重用桔梗為舟楫，使浮而不下也。為末，每服二錢抄在掌內，以舌舐之。此製治之緩也。

震按古今治消渴諸方，不過以寒折熱，惟苦與甘略不同耳。要皆徑直，無甚深義。獨此方委蛇曲折，耐人尋味。

東坡集載，晉山揭穎臣，長七尺，素健飲啖，忽得渴疾，日飲水數斗，飯亦倍進，小便頻數，服消渴藥逾年，病日甚，自度必死。蜀醫張鉉取麝香當門子，以酒濡濕作十餘丸，用枳椇子煎湯服之，遂愈。問其故，張曰：消渴消中，皆脾衰而腎敗，土不勝水，腎液不上，汴乃成此疾。今診穎臣脾脈極熱，腎脈



不衰。當由酒果過度積熱在脾。所以多食多飲多溺。不得不多。非消渴也。麝香壞酒果。枳椇能化酒為水。故假二物去其酒果之毒也。

震按此人似消渴實非消渴張公之見識殊高用藥最巧。

汪石山治一婦年逾三十常患消渴善飢腳弱冬亦不寒小便白濁浮於上者如油脉皆細弱而緩右脉尤弱曰此脾瘵也宜用甘溫助脾甘寒潤燥以參芪各錢半麥冬白朮各一錢白芍花粉各八分黃柏知母各七分煎服病除。

張景岳治周公年逾四旬因案牘積勞神困食減時多恐懼自冬春達夏通宵不寐者半年有餘而上焦無渴不嗜湯水或有少飲則沃而不行然每夜必去溺二三升莫知其所從來且半皆如膏濁液疔羸至極自必死但診其脈猶帶緩肉亦未脫知其胃氣尚存慰以無慮乃用歸脾湯去木香及大補元煎之屬一以養陽一以養陰出入間用至三百餘劑計人參二十觔乃得全愈此神消於上精消於下之證可見消有陰陽不得



盡言為火也。

震按此條與汪案略同。但無渴且不能飲。已具有虛無火之象。景岳喜用溫藥。然所謂養陽者。並不參以桂附。則知消而且渴。必非桂附所宜矣。予請下一轉語曰。消有虛實。不得遽認為寒。

孫東宿治一書。辨年過五十。酒色無憚。忽患下消症。一日夜小便二十餘度。清白而長。味且甜。少頃凝結如脂。色有油光。他醫治半年不驗。腰膝以下皆軟弱。載身不起。飲食減半。神色大瘁。孫診之。六部大而無力。經云。脉至而從。按之不鼓。諸陽皆然。法當溫補。下焦以熟地。六兩為君。鹿角霜。山茱萸。各四兩。桑螵蛸。鹿角膠。人參。茯苓。枸杞。遠志。兔絲山藥。各三兩。為臣。益智仁。一兩。為佐。桂附各七錢。為使。蜜丸。早晚鹽湯送。四五錢。不終劑而愈。此證由下元不足。無氣升騰于上。故渴而多飲。以飲多小便亦多也。今大補下元。使陽氣充盛。薰蒸于上。則津生而渴止矣。

震按生生子此條。實宗仲景飲一斗小便亦一斗。腎氣丸主之之法也。



張杲治黃沔久病渴極疲痺勸服八味丸數兩而安其學甚高然治一水二火者患消渴而用此方則大誤又閱滑伯仁案一消渴者醫謂腎虛津不上升合附子大丸服之渴益甚目疾亦作滑斥之曰此以火濟火不焦則枯令棄前藥以寒劑下之蕩去火毒繼以苦寒清潤之劑乃愈是不可同年而語矣洎宅編載一仕人患消渴醫者斷其逾月死又一醫令急致北梨二担食盡而瘥隋煬帝服方士丹藥蕩思不可制日夕御女數十人入夏煩躁日引飲數百盃而渴不止莫君錫進冰盤於前俾時刻望之是皆法外之法也他如本草載沒煮韭苗於清明前吃盡一觔劉完素以生薑自然汁一盆置室中具杓於傍給病人入室鏤之渴甚不得已而飲飲漸盡渴反減是皆內經辛以潤之之旨而交州記曰浮石體虛而輕煮飲治渴故本事方神效散浮石為君實神效無比

又按風寒暑濕燥火六淫之邪也江氏分類集案不立燥之一門緣諸



病有兼燥者已散見於各門。卻無專門之燥病。可另分一類耳。故於濕之下。火熱之上。間以消渴。蓋消渴有燥無濕也。其見解極是。允宜配列在此。

火

虞恒德治一婦。年四十餘。夜間發熱。早晨退。五心煩熱。無休止時。半年後。虞診六脉皆數。伏而且牢。浮取全不應。與東垣升陽散火湯。四服熱減大半。胸中覺清快。勝前。再與二貼。熱悉退。後以四物加知母黃柏少佐炒乾薑服二十餘貼愈。

震按夜熱脉數的係陰虛。因其脉伏且牢。浮取不應。故用升陽散火得效。仍以陰藥收功。然陰藥用六味地黃及二地二冬必不效。妙在芎歸合知柏及從治之炒乾薑也。

王仲陽治一婦。壯年。每患頭痛腹痛。十指痠痛。心志紛紜。鼻息粗甚。其脉甚大。蓋欲近男子不可得也。俗謂之花風。王以涼膈散青木香圓互換疎



導三五次更服三黃丸瀉三焦之火數日而愈曾有火旺遺精者亦用前丸散而愈。

薛立齋治沈大尹不時發熱日飲冰水數碗寒藥二劑熱渴益甚形體日瘦尺脉洪而數時或無力王太僕曰熱之不熱責其無火寒之不寒責其無水又云倏熱往來是無火也時作時止是無水也法當補腎用加減八味丸不月而愈。

汪石山治一人年踰三十神色怯弱七月患熱淋諸藥不效至十一月行房方愈正月復作亦行房而愈三月傷寒咳嗽有痰兼事煩惱延至十月少愈後復作服蘆吸散而愈但身熱不解因服小便腹內膨脹小腹作痛後又因晚卧左脇有氣觸上痛不能睡飲食減半四肢無力食則腹脹痛或瀉兼胸膈飽悶口舌乾燥夜卧盜汗自腰已下常冷久坐腰痛脚軟手心常熱診左手心脉浮數而滑腎肝二脉沉弱而緩右手肺脉虛浮而駛脾脉偏弦而駛命門散弱而駛次日再診心肝二脉細軟稍不見駛矣腎



脉過于弱。肺脉浮軟。亦不見駛。脾脉頗軟。命門過浮。略堅。汪曰。膀胱者。津液之府。氣化出焉。淋者。由氣餒。不能運化。故津液鬱結。為熱。而然也。房後而愈者。鬱結流利。而熱自解矣。三月天日和煦。何得傷寒。多由肺氣不足。莫能護衛皮毛。故為風邪所襲。鬱熱而動其肺。以致痰嗽也。得蘆吸散而愈者。以辛溫豁散痰與熱也。嗽止身熱不退者。由嗽久。肺虛。虛則脾弱。脾肺之氣。不能榮養皮毛。故熱作也。經曰。形寒飲冷則傷肺。又曰。脾胃喜溫而惡寒。今服小使之寒涼。寧不愈傷其脾肺耶。是以腹脹作痛。脇氣觸上。或瀉或汗。種種諸病。皆由損其脾肺也。時或變易。不常者。亦由氣血兩虛。虛而為盈。難乎有常矣。遂用參芪各二錢。茯苓白朮一錢。歸身牛膝七分。厚朴陳皮木香甘草各五分。薄荷三分。煎服二十餘貼。諸證悉退。後因梳頭勞倦。諸證復作。汪診脉與前頗同。但不數不駛耳。仍用參芪各三錢。麥冬歸身厚朴枳實甘草等劑而愈。

震按。王用寒瀉。薛用溫納。汪用平補。乃治火熱法三大綱也。故火門舊



案甚多。特選此以為式。

一人七月病上辰昏暈。下午不言。昏睡一日不醒。人叫不應。身涼不食。不寒不熱。皆曰陰證。議用理中四逆。周慎齋診其脉。沉小帶伏。曰內有火邪也。故小便一二日不解。延至夜不醒。周曰。此真火也。其妻曰。前日房事如何。是火。周曰。夜有房事。內虛又勞。熱甚。夫乾熱從虛入。則陰氣將絕。以水救之。則可。取冷水一桶。飲至五碗。病者曰。渴。飲至七碗。大汗如雨。病者曰。餓。吃粥一碗。用補中益氣湯加炮薑澤瀉。溫中瀉冷水而愈。

慎齋又治一婦。五月間身涼。自言內熱。水瀉二月。一日數次。小水絕無。大便俱水。自言上熱極。下凍死。腰腿足俱冷。腹痛如冰。或一時發熱。不欲近衣。或一時怕冷。遍身盡然。夜至天明。面目紅腫。藥之不愈。六脉洪大。此伏火也。火性炎上。故上熱下冷耳。用四物湯加柴胡葛根升麻甘草梔子黃芩黃柏二貼。小水行。瀉止。復發牙疼。三日不愈。用黃芪建中湯加附子一服。



一婦六月卒死。遍體俱冷。無汗。六脉俱伏。三日不醒。但氣未絕耳。衆用四逆理中。亦不能納。四日後。慎齋診之。仍無脉。念人一二日無脉立死。今三日不死。此脉伏也。熱極似寒耳。用水濕青布。放身上。一時身熱。遂飲冷水五六碗。反言渴。又一碗。大汗出。後用補中益氣加黃栢十貼愈。

震按慎齋之治上熱下寒。腹痛如冰。粗工必引立齋治韓州同之例矣。乃與虞公升陽散火湯同軌合轍。此等案必須合看則有益。至如飲以冷水。覆以濕布。亦是試火之真假也。

石頑治太史張宏蘧精氣下脫。虛火上逆。怔忡失血證。診其右關獨弦。左尺微數。餘皆微細。搏指明係陰火內伏之象。診後詳述去冬勞心太過。精氣滑脫。加以怵惕恐懼。怔忡驚悸不寧。都門之醫峻用人參桂附。至歲底稍可。交春復劇如前。遂乞假歸吳。吳門諸醫亦用參附。導火歸源。固斂精氣之藥。略無一驗。轉覺委頓。稍稍用心。則心系牽引。掣痛連脊。骨對心處。或時痛引膈脇。或時巔頂如掀。或時臂股手足指甲。皆隱隱作痛。怔忡



狀如碓杵控引頭中如失腦髓之狀夢中嘗自作文覺時成篇可記達旦  
倦怠睡去便欲失精精去則神魂如飛越之狀觀其氣色鮮澤言談豐贍  
總屬真元下脫虛陽上擾之候細推脉證始先雖屬陽氣虛脫過餌辛溫  
峻補致陽暴亢而反耗真陰當此急宜轉關以救垂絕之陰為疏二方煎  
用保元合四君丸用六味合生脉服及兩月後諸證稍平但倦怠力微因  
自檢方書得補中益氣湯為夏月當用之劑于中加入桂附二味一啜即  
喉痛聲瘖復邀診候見其面顏精采而聲音忽瘖莫解其故詢之乃尊知  
為升麻桂附升動虛陽所致即以前方倍生脉服之半月後聲音漸復日  
漸向安但起居調攝殊費周折衣被過暖便咽喉痰結稍涼則背微畏寒  
或啜熱飲則周身大汗怔忡走精此皆宿昔過用桂附餘熱內伏而尋出  
路也適有石門董載臣謂其伏火未清非苓連不能解散時值嘉平不敢  
輕用苦寒仲春載臣復至坐俟進藥服數劑形神爽朗是後堅心服之至  
初夏反覺精神散亂氣不收攝乃復就正于予予謂桂附湯藥火毒之性



力能上升得參以濡之故可久伏下焦與龍潛水底不異若究其源惟滋腎丸一方為正治但既經苓連折之于上豈堪復受知藥侵伐于下乎况自春徂夏不離苦寒苦先入心必從火化何敢兼用肉桂引動虛陽發其潛伏之性哉端本澄源仍不出六味合生脉經歲常服不特壯水制陽兼得金水相生之妙用何憚挂附之餘毒不化耶

震按此案甚平庸然辨證明晰用藥純正亦可為後學之津梁矣較之汪石山案深淺自別耳

### 霍亂

羅謙甫治一人年近八十六月中暑霍亂吐瀉昏冒終日不省人事時夜半請羅治脉七八至洪大有力頭熱如火足冷如冰半身不遂牙關緊急蓋年高氣弱當暑氣極盛陽明得令之際中暑明矣用桂苓甘露飲甘辛大寒瀉熱補氣加茯苓以分陰陽約一兩水調灌之漸漸省事三日後諸證悉去換人參補中湯以意增減十日後平復



又治蒙古百戶昔良海於戊午春攻襄陽回住夏曹州界因食酒肉多飲  
潼乳得霍亂吐瀉證從朝至午精神昏憤已困急來告羅視之脉皆浮數  
按之無力所傷之物已出矣即以新汲水調桂苓白朮散徐徐服之稍得  
安靜又於牆陰掘地約二尺許貯新水在內攪動待一時澄定用清者一  
盃再調服之吐瀉漸止至夜安卧翌日微煩渴遂煎錢氏白朮散時時服  
良愈或問用地漿者何也曰坤屬土土平曰靜順感至陰之氣又於牆陰  
貯新汲水以收重陰之氣陰中之陰能瀉諸陽中之陽霍亂由暑熱內傷  
所得故用地漿而愈

震按此案重在所傷之物已出故其用藥全不以多食酒肉過飲潼乳  
為治也

汪石山治一人年三十餘形瘦弱忽病上吐下瀉水漿不入口者七日自  
分死矣汪診脉八至曰當夏而得是脉暑邪深入也用人參白虎湯進一  
盃稍安後減去知母石膏加人參至四五錢以黃栢陳皮麥冬等隨所兼



病而佐使。一月平復。

江篁南治一人。於七月間得霍亂證。吐瀉轉筋。足冷多汗。囊縮。醫以傷寒治之。增劇。江診之。左右寸關皆伏不應。尺極微。口渴。欲飲冷水。乃以五苓散與之。覺稍定。向午猶渴。以五苓加麥冬五味滑石投之。更以黃連香薷飲。冷進一服。次早脈稍出。按之無根。人形脫。且呃。手足厥逆。飲食不入。則吐。大便稍不禁。為灸丹田八九壯。囊縮稍舒。手足稍溫。繼以理中湯。渴猶甚。咽疼熱不解。時或昏沉。飲以竹葉石膏湯而愈。

江應宿治一婦人。六月中旬。病霍亂吐瀉轉筋。醫投霍香正氣散。加煩躁面赤。揭衣臥地。江診之。脈虛無力。身熱引飲。此得之傷暑。宜辛甘大寒之劑。瀉其火熱。以五苓散加石膏滑石。吐瀉定。再與桂苓甘露飲而愈。

震按霍亂乃最輕之病。何以仲景於傷寒後列為一門。豈北五省之霍亂重於江浙耶。就江浙論。則霍亂因暑濕者多。香薷飲加苓半霍香蒼朮木瓜等即效。黃連石膏不可輕用。人參尤不可輕用。石山篁南二案。



不得不用人參。然汪案純是寒證。一用理中。即熱渴咽疼。可知暑月難投溫補也。若冬月霍亂。固有因寒者。香薷又在所戒。予生平於盛夏時。曾以真武湯治霍亂。其人吐瀉腹痛。四肢冷。脈微細。惡寒不渴。故敢用之。取效甚速。亦未嘗用人參也。

### 泄瀉

東垣曰。予病脾胃久衰。視聽半失。此陰盛乘陽加之。氣短精神不足。此由弦脈令虛多言之。故陽氣衰弱不能舒伸。伏匿於陰中耳。癸卯六七月間。霖雨陰寒踰月不止。時人多病泄利。乃濕多成五泄故也。一日體重肢痛。大便泄瀉。小便秘澇。默思內經云。在下者引而竭之。是利小便也。故經又云。治濕不利小便。非其治也。當用淡滲之劑。以利之為正法。但聖人之法。雖布在方策。其不盡者。可以意求。今客邪寒濕之淫。自外入裏。而甚暴。若以淡滲之劑利之。病雖即已。是降之又降。復益其陰。而重竭其陽。則陽氣愈削。而精神愈短矣。唯以升陽之藥為宜。用羌獨升麻各一錢。防風炙甘



草各五分。水煎熟服。大法云：寒濕之勝助風，以平之。又云：下者舉之。此得陽氣升騰，故愈。是因曲而為之直也。

震按：升陽以助春生之令。東垣開創此法，故羣推為內傷聖手。向來醫學十三科，有脾胃一科，謂調其脾胃，而諸病自愈。今已失傳。雖讀脾胃論，不能用也。

張子和治趙明之。米穀不消，腹作雷鳴。自五月至六月不愈。諸醫以為脾受大寒，屢用聖散子、豆蔻丸等，俱不效。戴人曰：春傷於風，夏必飧泄。飧泄者，米穀不化而直出也。又曰：久風入中，則為腸風飧泄。中者脾胃也。風屬甲乙。脾胃屬戊己。甲乙能剋戊己。腸中有風，故鳴。經又曰：歲木太過，風氣流行，脾土受邪。民病飧泄。診其兩手，脉皆浮數，為病在表也。可汗之。風隨汗出，泄當愈。以火二盆，暗置牀下，給之入室，使服涌劑，以麻黃投之。乃閉其戶，待一時許，汗出如洗，開戶滅火一半，須臾汗止，泄亦止。

附神秘名醫錄載龐從善治著作王公瀕泄利。診之曰：兩手三部中得



脾脉浮而弦。浮主風。弦主濕。又弦為肝脉。病因風濕外傷。致肝木刑於脾土。而為洞泄。又名飧泄也。內經云。春傷於風。邪氣留連。乃為洞泄。又云。春傷於風。夏生飧泄。其利下物。主渾白而完出是也。遂以五泄丸煎服之。數服而瘥。王公曰。從善年未四十。亦醫之妙進。曾撰脉法。鎡源論一部。共二十篇。示愚觀之。誠得叔和未盡之趣者也。

震按。龐公此條。已為張戴人導其先路矣。又郝允治夏英公病泄。太醫皆為中虛。郝曰。風客於胃。則泄。殆藁本湯證也。夏駭曰。吾服金石等藥無數。泄不止。其敢飲藁本乎。郝強進之。泄止。此皆以風藥治泄之模範也。然考倉公診陽虛侯相趙章病。曰其脉滑。是內風氣也。飲食下咽。而輒出不留者。名曰迴風。法五日死。猶能嗜粥。後十日乃死。所謂安穀者。過期也。即予所閱歷。凡直腸瀉者多死。不可概許以風藥能治也。

子和又治講僧德明。初聞家遭兵革。繼又為寇賊所驚。得藏府不調證。後入京。不伏水土。又兼心氣。以致危篤。前後三年。八仙丸。鹿茸丸。燒肝散。皆



服之不效。乃求藥於戴人。戴人曰：此洞泄也。以謀慮久不決而成。肝主謀慮。其則乘脾。久思則脾濕下流。乃上涌痰半盆。末後有血數點。肝藏血。故也。又以舟車丸。瀉川散。下數行。仍使澡浴出汗。自爾病乃日輕。後以胃風湯。白朮散。調養之。一月而強實復故矣。

又治一人瀉利不止。腹鳴如雷。不敢冷坐。坐則下注如傾。諸醫例斷為寒證。薑桂丁香豆蔻及枯礬龍骨之類。靡不徧服。兼以燔鍼灼艾。遷延將二十載。戴人診之曰：兩寸脉皆滑。余不以為寒。然其所以寒者。水也。以茶調散。涌寒水五七升。無憂散。泄積水數十行。乃通。因通用之法也。次以五苓散。淡劑滲利之。又以甘露散止渴。不數日而全愈。

震按久瀉治以吐法尚可學。吐後復用大下。不敢學。及觀項彥章治南臺治書郭公。久患泄瀉惡寒。日臥密室。以氈蒙首。熾炭助之。皆作沉寒。痼冷治不效。項曰：公之六脉浮濡。且微數。濡者濕也。數者脾有伏火也。病由濕熱。而且加之以熱劑。非苦寒逐之不可。乃先用羌活升柴澤瀉。



以升陽散火。繼以神芎丸下之。即去檀及炭而愈。此正善學子和者。  
羅謙甫隨征南副元帥大忒木兒駐揚州。時年六十八。仲冬。病自利完穀  
不化。臍腹冷疼。足跣寒。以手搔之。不知痛癢。燒石以溫之。亦不得暖。羅診  
之。脉沉細而微。乃曰。年高氣弱。深入敵境。軍事煩冗。朝暮形寒。飲食失節。  
多飲乳酪。履于卑濕。陽不能外固。由是清濕襲虛。病起于下。故斲寒而逆。  
內經云。感于寒而受病。微則為咳。盛則為瀉。為痛。此寒濕相合而為病也。  
法當急退寒濕之邪。峻補其陽。非灸不能。已其病。先以大艾炷于氣海。灸  
百壯。補下焦。陽虛。灸三里。二穴各三七壯。治形寒而逆。且接引陽氣下  
行。又灸三陰交。二穴。以散足受寒濕之邪。遂處方云。寒淫所勝。治以辛熱。  
濕淫于外。治以苦熱。以苦發之。以附子大辛熱。助陽退陰。溫經散寒。故以  
為君。乾薑官桂大熱辛甘。亦除寒濕。白朮半夏苦辛溫。而燥脾濕。故以為  
臣。人參草豆蔻炙甘草甘辛大溫。溫中益氣。生薑大辛溫。能散清濕之邪。  
葱白辛溫。以通上焦陽氣。故以為佐。又云。補下治下。制以急。急則氣味厚。



故作大劑服之不數服瀉止痛減足漸漸溫調其飲食逾十日平復明年秋過襄陽值霖雨旬餘前證復作依前灸添陽輔各灸三七壯再以前藥投之數服良愈方名加減白通湯。

震按用苦甘辛溫熱燥藥乃治瀉正法而輔以灸法尤妙。

白雲集曰黃子厚者江西人也精醫術鄰郡一富翁病泄瀉彌年禮致子厚診療浹旬莫效子厚曰子未得其說求歸一日讀易至乾卦天行健朱子有曰天之氣運轉不息故閣得在地中間如人弄碗珠只運動不住故在空中不墜少息則墜矣因悟向者富翁之病乃氣不能舉為下脫也又作字持水滴吸水初以大指按滴上竅則水滿筒放其按則水下溜無餘乃豁悟曰吾可治翁證矣即治裝往以艾灸百會穴三四十壯泄瀉止矣醫說會編註曰百會屬督脉居項巔為天之中是主一身之氣者元氣下脫脾胃無憑所以泄瀉是謂閣不得地經云下者上之所以灸百會愈者使天之氣復健行而脾土得以憑之耳銅人經謂百會灸脫肛其義



一也。

震按仲景傷寒論曰少陰病下利脈微瀉嘔而汗出必數更衣反少者當溫其上灸之上字即指百會穴也何待黃子厚始悟耶及讀資生經曰舊傳有人年老而顏如童子者蓋每歲以鼠糞灸臍中神闕穴一壯故也予嘗久患溇利一夕灸三七壯則次日不如廁連數夕灸則數日不如廁足見經言主泄利不止之驗是又與灸百會穴同一捷法又張子和云山東楊先生者治府主洞泄不已楊雖對病人卻與衆人談曰月星辰纏度及風雲雷雨之變自辰至未病者聽之而忘其圍楊嘗曰治洞泄不已之人先問其所慧之事好棋者與之棋好樂者與之笙笛勿輟是又於服藥灸火之外添一巧法蓋脾主信瀉久則以瀉為信使忘其圍則失其瀉之信而瀉可止矣

丹溪云叔祖年七十稟甚壯形甚瘦夏末患瀉利至秋深百方不效病雖久而神不悴小便瀼少而不赤兩手脈俱瀼而頗弦自言膈微悶食亦減



此必多年沉積。僻在腸胃。詢其平生喜食何物。曰我喜食鯉魚。三年無一。日缺。予曰積痰在肺。肺為大腸之藏。宜大腸之不固也。當與澄其源。則流自清。以茱萸、青蔥、陳皮、首蓿根、生薑煎濃湯。和以砂糖。飲一碗許。自以指探喉中。至半時。吐痰半升許。如膠。是夜減半。次早又飲。又吐痰半升而利止。又與平胃散加白朮、黃連。旬日十餘貼而安。

又治一老人。右手風攣多年。九月內泄瀉。百藥不效。右手脉浮大洪數。此太陰經有積痰。痰肺氣壅遏。不能下降。則大腸虛而作瀉。當治上焦。用蘿蔔子。搗和為漿。水探之。吐大塊膠痰。碗許。隨安。

一富兒。面黃善咬。易飢。非肉不食。泄瀉一月。脉大。以為濕熱。當困而食少。今反形健而食多。不渴。此必疳蟲也。驗其大便果有蚘。治蟲而愈。次年夏初復瀉。不痛而口乾。朱曰。昔治蟲而不治疳。故也。以去疳熱之藥。白朮湯下。三日而愈。後用白朮為君。芍藥為臣。川芎、陳皮、黃連、胡黃連、佐。蘆薈為丸。白朮湯下。禁肉。與甜。防其再舉。



一人性狡躁。素患下疳。瘡。或作或止。夏初患自利。膈微悶。醫與理中湯。悶厥而甦。脉濇重。取略弦數。朱曰。此下疳之深重者。與當歸龍薈丸去麝。四貼而利減。又與小柴胡去半夏。加黃連。白芍。川芎。生薑。數貼而愈。

震按丹溪四紫。其吐法猶為子和所常用。而一究其嗜食之何物。一憑其右脉之洪數。灼見為積痰在肺。然後用吐。吐藥亦復不同。較之子和。不辨寒熱虛實。總與吐下者。誰聖誰狂。至於治蟲疳治下疳。其巧更難及。

呂滄洲治帥府從事帖木失爾。病下利完穀。眾醫咸謂洞泄寒中。日服四逆理中輩。彌劇。呂診其脉。兩尺寸俱弦大。右關浮於左關一倍。其目外眦如草滋。乃知肝風傳脾。因成飧泄。非藏寒之故。飲以小續命湯。損麻黃。加朮。三五升。利止。續命非止利藥。飲不終劑而利止者。以從本治故也。

震按此條與張子和治趙明之條。似同而不同。彼為外風所傷。此則內風相傳。治雖彷彿。義有分別也。又滄洲治御史王彥芳。內食泄。彌年。當



秋半。脉雙弦而浮。乃曰夫人之病。蓋由驚風。非飲食勞倦所致也。以肝主驚。故虛風自甚。因乘脾而成瀉。當金氣正隆尚爾。至明春則病將益加。夫人自述。因失銅符而驚懼。由是疾作。乃用黃犢牛肝。和以攻風健脾之劑。踰月瀉止。是又內風一種也。

滑伯仁治一人。暑月泄瀉。小便赤。四肢疲困。不欲舉。自汗微熱。口渴。且素羸瘠。醫以虛勞。將峻補之。伯仁診視六脉虛微。曰。此東垣所謂夏月中暑。飲食勞倦。法宜服清暑益氣湯。投二劑而病如失。

震按。自汗微熱。口渴溺赤。在暑月自屬中暑形象。四肢困倦。不欲舉。固虛也。亦即暑傷氣也。法本宜補。而峻補則暑不能清。仍未入穀。故清暑益氣湯效最速。

汪石山治一人。於幼時誤服毒藥。泄痢復傷食。大瀉不止。後雖能食。不作肌膚。每至六七月。遇服毒之時。痛瀉復作。善飢多食。胸膈似冷。夜間發熱。嗜卧懶語。聞淫慾言。陽舉心動。驚悸盜汗。喉中有痰。小便不利。大便或結。



或溇過食則嘔吐泄瀉。脉皆濡弱而緩。右脉略大。猶覺弱也。次日左脉三五不調。或二三至緩。三五至駛。右脉如舊。緩弱其左脉不調者。必動欲以搖其精也。其右脉緩弱者。由於毒藥損其脾也。理宜固腎養脾。遂以參朮茯苓芍藥黃芪麥冬各一錢。歸身澤瀉各七分。知栢山查各六分。煎服而安。

震按此條脉甚奇。論脉亦奇。可以廣學者之見。

程明佑治一人下泄。勺水粒米不納。服湯藥即嘔。程診之曰。病得之飲酒。脾惡濕。湯藥滋濕矣。以參苓朮和粳米為糕食之。病旋已。所以知其病得之飲酒過多者。切其脉濡緩而弱。脾傷于濕也。

震按濡緩而弱。是虛脉。亦是濕脉。參苓朮作糕代湯補虛不助濕。與後之晚食前進熱藥同一巧思。

薛立齋治錢可久。善飲面赤痰盛。大便不實。此腸胃濕痰壅滯。用二陳苓連山梔積實乾葛澤瀉升麻一劑。吐痰甚多。大便始實。此後日以黃連三。



錢泡湯飲之。而安。但如此稟厚不多耳。

震按此條重在如此稟厚不多。白而日以黃連三錢泡湯飲。又當知如此治法亦殊少。

又一入年六十。面帶赤色。吐痰口乾。或時作瀉。謂薛立齋曰。僕之證。或以為脾經濕熱。痰火作瀉。率用二陳黃連枳實神麩麥芽白朮柴胡之類。不應何也。薛診之。左關弦緊。腎水不能生肝木也。右關弦大。肝木乘脾土也。此乃脾腎虧損。不能生剋制化。當滋化源。不信。薛謂人曰。此翁不久當損于痢矣。次年果患痢歿。

震按左關弦緊。右關弦大。淺見者不過平肝清濕熱而已。服之不應。不能解其何以不應也。院使此案。可作暗室一燈。

江應宿治黃水部新陽公患脾腎泄十餘年。五鼓初必腹痛。數如廁。至辰刻共四度。已午腹微痛而泄。凡七八度。日以為常。食少倦怠嗜卧。診得右關滑數。左尺微弦無力。此腎虛而脾中有積熱也。投黃連枳實丸。腹痛漸



除漸至天明而起更與四神丸八味丸滋其化源半年飲食倍進而泄愈  
震按此條本虛標實又是一格居先清後溫卻是正法

附有人每日早起必大瀉一行或時腹痛或不痛空心服熱藥亦無效  
後一醫令於晚食前更進熱藥遂安蓋熱藥服於清晨至晚藥力已過  
一夜陰氣何以敵之晚間再進熱藥則一夜熱藥在腹足以勝陰氣矣  
此可為用熱藥者又闢一法

一人久患泄瀉以暖藥補脾及分利小水諸法不應一醫診之心脉獨  
弱乃以益心氣藥兼補脾藥服之遂愈蓋心火能生脾土又於命門火  
生脾土之外另伸一義也

宋徽宗食冰太過病脾疾國醫不效召楊介進大理中丸上曰服之屢  
矣介曰疾因食冰臣請以冰煎此藥是治受病之源也果愈震按此又  
於諸法之外另伸一義穎悟者可以觸類旁通

李士材治閩人張仲輝素縱飲又喜啖瓜果忽患大瀉諸用分利燥濕者



俱不效。李診其六脉皆浮，乃引經言：春傷於風，夏生飧泄。用麻黃三錢，參朮各二錢，甘草升麻各一錢，取大汗而愈。

震按：此即效戴人治趙明之之法，而加參朮尤為穩當。

繆仲淳曰：金壇莊斂之，素壯實，善啖，仲夏忽患泄瀉，一應藥粥蔬菜入喉，覺如針刺，下咽即辣，因而滿腹絞辣，隨覺腹中有氣，先從左升，次即右升，氤氳徧腹，即欲如廁，彈響大泄，肛門恍如火灼。一陣甫畢，一陣繼之，更番轉廁，逾時方得離廁，所瀉俱清水盈器，白脂上浮，藥粥及蔬菜俱不化而出，甚至夢中大遺，了不收攝。諸醫或云停滯，或云受暑，或云中寒，百藥雜投，竟如沃石。約月餘，大肉盡脫，束手待斃。予往診之，脉洪大且數，知其為火熱所生病。用川黃連三錢，白芍五錢，茯苓扁豆石斛車前各三錢，橘紅二錢，炙甘草一錢，煎成，將井水澄冷，加童便一盃，藥甫入喉，恍如飲薄荷汁，隱隱沁入心脾，腹中別成一清涼世界，遂臥達旦，洞瀉頓止。連服三劑，大便已實。前世時藥粥等物，凡溫者下咽，腹中遂覺氣升，即欲大解。一切



俱以冷進方快。至是覺惡心畏冷。旋易以溫。始相安。余曰：此火退之徵也。前方加人參二錢五分。黃芪三錢。蓮肉四十粒。紅麴一錢五分。升麻五分。黃連減半。五六劑後。去升麻。又服三十餘劑。瀉已久止。而脾氣困頓。不知飢飽。且稍飲茶湯。覺腸滿急脹。如欲寸裂。余曰：大瀉之後。是多亡陰也。法宜用補。倘此時輕聽盲師。以香燥取快。暫時元氣受傷。必致變成臃脹。而不救矣。為定丸方。熟地黃八兩。萸肉山藥人參黃芪各五兩。牛膝五味子白芍各六兩。炙甘草一兩。紫河車二具。蜜丸。空心飢時各一服。而日令進。煎方。斂之。相信甚力。堅守二方。服幾年。脾胃始知飢而嗜食。四體亦漸豐矣。其病初平。後予勸其絕慾年餘。斂之。因出妾。得盡發家人陰謀。乃知向之暴瀉。由中巴豆毒。本草中巴豆毒者。黃連冷水解之。余方恰與暗合。向使如俗醫所擬。停滯受寒。中暑法治之。何啻千里。即信為是火。而時師所投黃連。不過七八分。至錢許止矣。况一月之瀉。未有不疑為虛寒者。敢用黃連至四錢乎。始知察脉施治。貴在神而明之也。



附仲瀆曰。余治斂之瀉止後。恐其元氣下陷。急宜升舉。用升麻以提之。初不知其為中毒也。乃因用升麻太早。致濁氣混于上焦。胸中時覺似辣非辣。似嘈非嘈。迷悶之狀。不可名狀。有時滴酒入腹。或咳一切果物。稍辛溫者。更寬苦不勝。莊一生曰。此病在上焦。湯液入口。即下注。恐未易奏功。宜以噙化丸治之。用貝母五錢。苦參一兩。真龍腦。薄荷葉二錢。沉香四錢。人參五錢。為末。蜜丸。如彈子大。午食後臨卧時。各噙化一九。甫四丸。胸中恍如有物推下。三年所苦一朝若失。

震按此條。初時用冷藥冷服。人猶可及。至不知飢飽。脹滿欲裂。不用六君五皮。竟以熟地。萸肉。參。芪。五味。河車。填補。斷不可及。莊一生之噙化丸。亦未易及也。

孫一奎治溲水。令君吳湧瀾夫人。每五更倒飽。必瀉一次。腹常作脹。間亦痛。脉兩手寸關洪滑。兩尺沉伏。孫曰。此腸胃中有食積痰飲也。乃與總管丸三錢。生薑湯送下。大便雖行。不甚順利。又以神授香連丸和之。外用滑



石甘草木香枳殼山查陳皮白芍酒連調理而安。

吳九宜每早晨腹痛泄瀉者半年。冀色青腹膨。人皆認為脾腎泄也。為灸關元三十壯。服補脾腎之藥。皆不效。自亦知醫。謂其尺寸俱無。脈惟兩關沉滑。大以為憂。恐瀉久而六脈將絕也。東宿診之曰。君無憂。此中焦食積。痰泄也。積膠於中。故尺寸脈隱伏不見。法當下去其積。諸公用補。謬矣。渠謂敢下耶。孫曰。何傷。素問云。有故無殞。亦無殞也。若不乘時。久則元氣愈弱。再下難矣。以丹溪保和丸二錢。加備急丸三粒。五更服之。已刻下。稠積半桶。脹痛隨愈。次日六脈齊見。再以東垣木香化滯丸調理而安。

震按二條亦皆通用之法。但總管丸合神授香連丸為一路。保和丸加備急丸為一路。要看其對證投藥處。又二證皆不以參朮調理。次案更以木香化滯丸調理。是即神明於規矩之外者。

喻嘉言治陳彥質下利證。因舊患腸風下血。近三十年。體肥身健。不以為意。一冬忽然下血數斗。蓋謀慮憂鬱。過傷肝脾耳。延至春月血盡而下塵。



水。水盡而去腸垢。納食不化。直出如箭。肛脫三五寸。晝夜下利二十餘行。面色浮腫。唇焦口乾。鼻煤。咸云不治。喻獨以為有五可治。乃曰。若果陰血脫盡。當目盲無所視。今雙眸尚炯。是所脫者下焦之陰。而上焦之陰猶存也。一也。若果陽氣脫盡。當汗淋漓。目前無非鬼像。今汗出不過偶有。而見鬼亦止。二次是所脫者脾中之陽。而他臟之陽猶存也。二也。胃中尚能容穀些少。未顯嘔吐噦逆之證。則相連臟腑未至交絕。三也。夜間雖艱於睡。然交睫時亦多。更不見有發熱之候。四也。脉已虛軟無力。而激之間亦鼓指。是稟受原豐。不易摧朽五也。但脾臟大傷。陽陷入陰。故大股熱氣從肛門泄出。如火之烙。則陽氣去絕不遠耳。生死大關全於脾中之陽氣。復與不復定之。陽氣漸復。則食可漸化。而肛亦漸收。泄亦漸止矣。用藥惟參朮之無陂。復氣即寓生血。祇嫌纒入胃中。即從腸出。乃先以人參湯調赤石脂末服之。稍安。次以人參白朮赤石脂禹餘糧為丸服之。全愈。

少司馬李萍。搓食飲素約。三日始一更衣。偶因大便後寒熱發作。有時頗



似外感其實內傷。非感也。緣素艱大。便努掙傷氣。故便出則陰。乘於陽而寒。頃之少定。則陽復勝陰而熱也。若果外感之寒熱。何必大便後始然耶。醫者先治外感不應。謂為濕熱。而用滑利之藥。驅導之。致向來燥結者。轉變腸澼。便出急如箭。肛門熱如烙。又用滑石木通芩瀉等。冀分利小水。以止泄。不知陰虛自致泉竭。小便從何得來。於是食入不能停留。即從下注。將腸中之垢。暗行驅下。其臭甚腥。色白如膿。雖大服人參而下。空反致上。壅胸膈不舒。喉間頑痰窒塞。口燥咽乾。徹夜不寐。一切食物。惟味薄質輕者。胃中始愛而受之。久久陰從瀉傷。陽從汗傷。兩寸脈浮而空。陽氣越于上也。關尺脈微而細。陰氣越于下也。陰陽不相維。則勢趨不返矣。議用四君子湯。為補脾胃之正藥。去茯苓以其淡滲。恐傷陰也。加山茱萸以收肝氣之散。五味子以收腎氣之散。宣木瓜以收胃氣之散。白芍藥以收脾氣及臟氣之散。合之參朮之補。甘草之緩。再佐升麻之升。俾元氣下者上。而上者下。團聚於中不散。斯脈不至。上盛腹不至。雷鳴汗不至。淋漓肛不至。



火熱庶飲食可加便泄漸止是收氣之散為喫緊關頭故取四味重複藉其專力又須大劑藥料煎濃膏調餘糧赤石脂二末頻服緩咽為佳古云下焦有病入難會須用餘糧赤石脂蓋腸胃之空非二味不填腸垢已去非二味不復其粘着之性又况悞以石之滑者傷之必以石之澀者救之尤有同氣相求之義耶

震按二條以補救虛以瀉固脫乃治久利之舊法次案大劑酸收則新法也

周慎齋治一人常臍痛痛則大便泄此脾虛腎水上泛以下犯上寒在腎也宜溫腎則水安不泛升胃氣則土旺而痛不作瀉從何來用白芷七錢北味鹿茸人參炮薑各一兩元米糊丸白湯下

震按此條立言簡括立方精卓近惟葉案有云久瀉無不傷腎食減不化陽不用事八味腎氣乃從陰引陽宜乎少效用鹿茸人參陽起石茯苓炮附子淡乾薑可與此方並峙



傷食

羅謙甫治博兒赤馬刺因獵得兔以火炙食過多抵暮困倦渴飲潼乳斗餘是夜腹脹如鼓疼悶亂吐瀉不得躁擾欲死其脉氣口大二倍於人迎右關尤有力蓋炙肉乾燥多食以致發渴暢飲潼乳肉得濕而脹滂腸胃俱填塞無更虛更實傳化之理內經云陰氣者靜則神藏躁則消亡飲食自倍腸胃乃傷今因飲食太過使陰氣躁亂神不能藏死在旦夕矣若非峻急之劑豈能斬關奪門遂以備急丸十粒分二次服又與無憂散五錢須臾大吐大下約去二斗餘腹中漸空快次日以粥飲調理而愈

茶商李富人也咬馬肉過傷腹脹醫以大黄巴豆治之轉劇抱一翁項彦章後至診之寸口脉促而兩尺將絕彦章曰胸有新邪故脉促宜引之上達今反奪之誤矣飲以涌劑且首李中座使人環旋頓吐宿肉仍進神芎丸大下之病去眾咸服

孫東宿治大宗伯董濤老年六十七向有脾胃疾暑月以過啖瓜果而胸



膈脹痛診其脉寸關弦緊觀其色神藏氣固考其所服藥不過二陳平胃加查芽等不知此傷於瓜果寒濕淫勝也經云寒淫所勝治以辛溫而瓜果非麝香肉桂不能消前方所以無效耳乃用高良薑香附各一兩肉桂五錢麝香一錢為末每服二錢酒調下之兩三日則胸膈寬而知餓矣

龔雲林治一人臘月嗜食羊肉數觔被羊肉冷油凍住堵塞在胸膈不下脹悶欲死諸醫掣肘龔見其六脉俱有用黃酒一大罈溫熱入大缸內令患者坐於中眾手輕輕亂拍胸腹背心令二人吹其耳又將熱燒酒灌之次服萬億丸得吐瀉而愈

震按繆仲淳治老人傷冷食及難化之物用老薑紫蘇煎湯置浴鍋內令病人浸其中以熱湯揉心胃肚腹氣通而食化與此法同

石頑治幼科汪五符夏月傷食嘔吐發熱顛脹自利黃水徧體肌肉捫之如刺六脉模糊指下尋之似有如無足脛不溫自認陰寒而服五積散一服其熱愈熾昏卧不省第三日自利不止時常讖語至夜尤甚乃舅葉陽



生以為傷暑而與香薷飲遂頭面汗出如蒸喘促不寧足冷下逆欬醫程郊倩以其證大熱而脉息糳糊按之殊不可得以為陽欲脫亡之候欲猛進人參附子雲間沈明生以為陰證斷無汗出如蒸之理脉雖虛而證大熱當用人參白虎爭持未決取證于石頑診其六脉雖皆濇弱糳糊而心下按之大痛舌上灰刺如芒乃食填中宮不能鼓運其脉往往多此當與涼膈散下之諸醫正欲藉此脫手聽其用藥一下而神思大清脉息頓起當知傷食之脉雖當氣口滑盛若屢傷不已每致濇數糳糊乃脾不消運之兆也此證設非下奪而與參附助其壯熱頃刻立斃可不詳慎而妄為施治乎。

葉新宇停食感冒而兩寸關皆濇數糳糊兩尺皆沉弦而按之益堅雖其人尚能行走而脉少冲和此必向有陳氣在少腹詢之果患寒疝數年因緩辭不使用藥是夜即腹暴滿而逝門人問曰葉子偶抱小恙何以知其必死而辭之曰凡人胃滿則腸虛腸滿則胃虛更實更虛其氣乃居今胸



有食而腹有積。上下俱困。能保其不交攻為患乎。當知厥疝入腹。腳氣冲心等疾。皆是陰邪搏結鬱積既久。則挾陰火之勢而上升。若胸中陽氣有權。則陰邪仍歸陰位而止。今胸中先為宿食填塞。腹中陳氣不逆。則已逆。則上下俱滿。正氣無容身之地。往往有暴絕之虞。所以不用藥。實未知其即死也。故凡診六部中病脈。有不相應處。即當審其有無宿病。不可輕忽。以招誹謗也。

震按傷食原非重病。故所選不多。然諸法咸備。靡巧不臻。毋庸買菜求益矣。

### 不食

丹溪治一室女。因事忤意。鬱結在脾。半年不食。但日食熟菱大棗數枚。遇喜。食饅頭彈子大。深惡粥飯。朱意脾氣實。非枳實不能散。以溫膽湯去竹筴數十貼而安。

又治一少婦。年十九。因不如意。遂膈滿。不食累月。憊甚。不能起坐。已午間。



發熱面赤。酉戌方退。夜間小便數而點滴。月經極少。脉沉瀋短小。重取皆有此氣。不遂而鬱於胃口。內有瘀血。卻因病久。元氣已虛。中宮又以勉強進食。鬱而生痰。法宜補瀉兼施。以參朮各二錢。茯苓橘皮各一錢。紅花六分。食前煎服。少頃與神佑丸減輕粉牽牛為細丸。如芝麻大。唾津嚥十五丸。日夜二藥各四服。次日食進。三日熱退而愈。


附四明僧奉真治天章閣待制許元之子。瞑目不食。已逾宿矣。奉真曰。脾已絕不可治。死在明日。元曰。予方陞對。能延數日之期否。奉真曰。如此自可。諸藏皆衰。惟肝獨盛。脾為肝所勝。其氣先絕。一藏絕則死。若急瀉肝氣。令肝衰。則脾少。緩可延三日。過此無術也。乃投藥。至晚稍清爽。能張目。漸進稀粥。明日更輕。安能食。病家喜。奉真笑曰。此不足喜。肝氣暫舒耳。無能為也。後三日果卒。

震按不食之因甚多。而因鬱因怒。其大端也。所載三案。可以為式。至因他病而不食者。不在此例。夫人身以胃氣為本。經年累月。粥飯全廢。似



無不死者。然予曾見兩家閨女。皆十餘歲。皆無病。漸漸厭惡粥飯。每日  
畧啖菱栗棗橘落花生芝蔴薄脆豆腐乾之類。或飲酒一二盃。或腐漿  
數口而止。其父母甚憂之。予視其形色不變。起居如常。六脉勻平。乃許  
以無事。亦不處方。後皆婚嫁生子。蓋穀肉蔬果。均以養生。去穀而猶存  
三項。與絕食者原不同耳。但女與男。又別有說。陽動陰靜。陽開陰闔。若  
童男不食粥飯。究非所宜。







K952  
1909  
v. 2